

## La plouje e lou bèth téms.

Qui auré dit qu'anabe càle aluca lou cauhàdje au més de Julhét ? ce demande Sidoni à las soûes pratiques.

Dus més après que soun en trî de parla d'aquères tristes semmanes.

Bernatou de Cachole qu'en sap quàuqu'arré.

- La hilhe e lou gèndre, qui demouren à Nice coum at sabét, que soun biénguts en bacances dap lous dus dròlles. Qu'ous a calut presta paraploujes e qu'an debut croumpa màntous. Simone que m'a dit coum aco : pràube papa, se lou julhét de gnaùte an éy coum aquéste, ne pénsi pas que bieneram à Sén Espedit.
- Quin bos qu'at sapi, que l'éy respounut. Aci qu'abém la plouje, à bòste qu'éy lou mistral e ne séy pas ço qui éy lou miélhe.
- Bas pas coumpara, qu'éy la Coste d'Azur qui hè biéne lou méy de mounde.
- Labéts perqué t'en biéns aci ?
- Permou que y souy badude tè !
- Ço qui bo dişe que s'èri badut à Nice ne bienerés pas passa las bacances en Biarn.

Touts qu'an escoutat Bernatou chéns dişe arré permou ne cau pas mescla-s dous ahas de familhe. Qu'éy l'Alberoû de Cubach qui-s gahe au prouséy.

- Quoan me maridèy qu'anèm justamén ha û tour à Nice, Elise e jou. En arriban aciu que debarèm héns û oustau oun lou patroû - qui abè percebut lou nouste accén dou Sud-Ouest - ens abouè qu'ère natiu d'Aulouroû. Qu'èm dou coustat de Pau ce-u respounoum. Que lhebè lous bras au cèu.
- Que bienét ha per aci ? En Biarn tout qu'éy bér, aci tout qu'éy cremat p'ou sou, e méy qu'aco qu'abét la mountagne e la ma à pourtade.

Que-ns'en hasou tan de reclame que per chic que serém tournats parti ta nouste. Més plâ segu que demourèm.

- E que hasou plâ, persequéch Bernatou.
- Qu'ès tu qui at dits. Permou que toute la semaine, û mistral dou diàble que bouhè e ne dechè pas de plabe.
- Maridàdje ploujoûs, maridadje urous. Coum toustém, Moussu Gastoû que trobe la boune respounse.

**Û de las cadières.**